

ديوان
شعري

تسجيل نجدية



تحت إشراف
نجلأء النجدي

الشاعر
عوض حسني

أخفي وجعي خلف ابتسامة باهتة، فالعالم لا يمنح كنفًا لمن يسقط.
كل شيء يمضي... إلا الألم، يسكن القلب وكأنه لاجئ بلا وطن.

_مريم نصر

جنييه

اطلعي مني ... وسبيني في حالي
من قبلك أنا كنت تمام
ابعدني عني... وسبيني اداري
تجريحك فيا مع الايام
من بعدك مش عارف انام
ولا عارف حتي ابعد عنك ... ولا عارف حتي اكون وياكي
انتي اللعنه بيها أنا ملعون
تعويضه بلمسه علي كف زبون
اصل ازاي واحد زي بعقله ... يتشقلب حاله لواحد مجنون
ما كتير قبلك مر علينا ... قدرناهم وقدرو فينا
اشمعنا المسأله فيكي عويصه
بنت في جسد انثي بدماغ إبليس
لي ربطاني وياكي ولي حاله متحليني
وعاجبك لي تعذيبي وسمك جاري في شرابي
حليني وسبيني لنفسني
واديني فرصه اخذ نفسي
وافكر في الخطوه الجايه
وأشوف صرفه لجنييه
ربطاني بقيود الشوق

لفاني بحبال العشق
وانا قاعد علي كرسي الصبر
ومتيتم بقماشه الصمت
تعويذه مكتوبه بحبر
قال اي فاكر اني وصلت
واني خلاص هنساکي
اتاريني وانا لوحدي معاکي
قصادي وبلف القاكي
ملعون ابو ام الحب والساعه الي قابلتك فيها
ملعون قلبي الناقص ورافض يكمل غير بيها
ملعونه الدنيا الي مصممه ترميني في سكتها تملي
تلعب لعبتها والاقبها في وشي اوطي الاقبها في ضلي
والله حرام الي بيحصلي
انا نفسي ارجع زي زمان
واحد بيعيش الدنيا بكيفه
ومبيفرقش معاه الناس
ولا مين سابني
ولا مين جالي
فاطلعي مني اطلعي مني
وسيبيني في حالي .

الوطن

يعني اي الوطن؟

يعني سرح كبير عشاننا... يعني بيت لينا في مكانا

يعني شغل يهد حيلنا ... كله لجل عيون وطنا

الوطن

يعني ألفه وبيت وعيله ... يعني صحبه تكون اصيله

بنت حلوه عيون جميله ... يعني صاحبي شايلي شيله

اتخانقنا كثير ساعات ... لينا في وطنا ذكرات

نفتكرها كل ليله

الوطن

يعني امي في كل كلمه ... جبره خاطري بكل زمه

واخده بايدي من طفولتي ... علمتني ازاي رجولتي

عرفتني ازاي اعيش ومتنازلش عن مبدائي

علمتني ازاي اكون راجل صحيح مش كسر عيره

الوطن عندي مملكه وامى فيه هي الاميره

الوطن

يعني أهله ... ناس جميله قلوبها بيضاء

طلعان عينيهم على الحديده

و المعيشه في وطنا ليها مليون طريقه

ولجل أن أهله مسلمين

وموحدين بالله عارفين
أن الحرام سكه بعيده
بيعافرو فيها بالحلال ... واختارو السكه الصحيحه
الوطن

يعني الصباح
يعني بفه من حضانه... شله حلوه شباب نضيف
يعني لمه علي القهاوي... نسمع ماتش عشان وصيف
يعني صاحبي في وقت ضيقتي

يعني صاحبي أخته اختي

وان صاحبي من منطقتي

دا بيتقاله يا ابن جيھتي

هو دا معني الوطن

والوطن

يعني الحبيبه ... يعني بنت اصول وصالحه

مش معايا عشان تسالي ... لا عشان فستان وطرحه

وزفه حلوه تكون عشانا... وعشان معايا دي احلي فرحه

الوطن هو الوطن

مهما مر من سنين

لينا فيه زكريات

مبتتنسيش مهما مر عليها زمن

من وجه نظري هو ذا معني
الوطن .

إشتقتك

من يومين

بليل ما بين اتناشر ل اتنين ... وانا قاعد كالعاده لوحدي

حسيت بشي جوايا ... اقدر اوصفه وصفين

حاجه مبين صعب ولين ... قاسي وهين

لكن بيين وتعابير وشي فضحاني

أن أنا مشتاق ... وان البعد مآثر فيا

كيف المقتول ... خلاني اقول

لي يا فراق فرقت مبينا ... تعشمتنا في بعض وتحرمنا

ولي جاي دلوقتي تفكرنا ... بعد مكنا مسحنا دموعنا

خدتني من وضع الاستقرار ... وفي سكتها تاني رامتني

دا انا كنت مصدقت لاقتني ... جمعت في بعضي ولمتني

وقولت اعيش حبه لنفسي ... لي عجبك كسره نفسي

ولي ديما جاي عليا ... ما ياما كتير مر عليا

اشمعنا هي تفكرني بيها ... ومعاليها ست الحسن

يا حبيبي اشتقتك

وبكل ما فيا بحنك ... وعاوز نرجع من تاني

عارف والله اني الجاني

واني مقدرتش حبك ... ارجعي علشانك وعشاني

تعالى نفكرنا بينا وبليالينا ... وكلامنا وهزارنا وغناوينا

وكل حلو مر علينا

يا حبيبتي

صدقتك وهمشي معاكي علي طريقتك

وامنتك وبحنك

وبكل حب بقولهاك

اشتقتك .

نرجع من الاول

متيجي نعيدها من ثاني

ونعيد الحلو في أيامنا

تعالى نغير حسبتنا

وننقل كده علي خصامنا

ونشوف الباقي من العمر

ونكمل سكه احلامنا

بكفايه الوجع الي مطول

متيجي نعيدها من ثاني

ونرجع نبداً من الاول

والناس

بلاش تسمعي لكلام الناس علشان كلامهم مش بيحل

بيعقد عقده ورا التانيه كلامهم عندك هيكون

اني فلاتي شيطان ذكوري يهودي كافر اناني

ولجميلك ناكر

هو كان يحلم اصلا تبقيه بيغني لكل بنات الدنيا

ويجيلك انتي تغنيه

كل اسبوع مع واحده. وبيجي يقفلك عالواحد

بطلي بقا تحنيه ويلا ابدائي شوفي بديله

وانسيه علشان دا ناسيكي. مش اخر راجل في الكون

...

كلامهم عندي هيكون
أنك كدابه قلابه خاينه
عاهره جانيه
مش لونك مش لايقه عليك
ايد ماسكه في ايديك
والايد التانيه بتخونك
مش هتصونك
مش دي الي تكمل علشانها
بسببها عامل حزنك اوضه
يوماتي فيها بتبات
فك ياعم
الدنيا مليانه بنات
كلام الناس سكاكين
بتقطع في حبال موصوله
تعالى نفتح دفاترنا
من بعدك باتت مقفوله
ونبدا صفحه جديده
صفحه مفيهاش الا أنا وانتى
قالو فكرتنا بعیده

تعالى نصغرهم كلك
أن كلامهم مش صح
أن كلامهم متحول
تعالى نعيدها من تانى
ونرجع تانى من الاول
شكرا .

مش عاوزك

دي اخر حاجه اكتبها ليكي
الي زمان بالنسباله كنتي الحلم
بيعافر في الدنيا بطوله
علشان تبقيه
وفي أحزانه تكوني له الحزن
تراضيه وتضحكي فيه وتغنيه
دلوقتي بيقول مش عاوزك
وانا عقلي سليم ميه الميه
وبكل قوايا العقلية
واعي كويس للي بقوله
مش عاوز اشوفك لو صدفه
ولا عاوز تاني كلام بينا
لو حتي سلام
في اي بينا يتسمي سلام
دا مفيش بينا غير الكدبه
مش هحاول تاني علشان خاطرك
وهشيل قلمي من علي سترك
هكون الصائم يوم عيد فترك
واذا كان علي الحب فلاقيناه

الحب الي بجد وجدين
منهونش فيوم وياه
ولو اكون زعلان بيقالي حزين
ومعاه مش عاوز بني ادمين
نتخايق مره اتنين الفين
ميسيبش الايد ولا اسيب ايده
اهو دا بالطبط الي بريده
وربنا عوضني خلاص بيه
فبجد وفعلا بدعيالك
روحي الله يصلح حالك
وتشوفي نتيجه أفعالك
وتشوفي ازاي جيتي عليا
وساعتها هتكوني وحيدة وعنيدة
وتعيشي كمان دور ضحيه
هتقابلي الي يجرح قلبك
ويدوس عليه وعلي حبك
هتحاولي معاه وحيلك يتهد
هيسيبك ويشوف غيرك
ما هو أصله دا دين ولازم يتسد
هتجيلي مكسوره من الايام

بالجزء الفاضل من قلبك
وتقولي عاوزاك
ارجع ليا عاوزه ابقى معاك
وبكل ما فيا من استهزاء
هقول مش عاوزك
ومن غير سلام .

سلامي

تخيل واحده تعيش وياك
علي الحلوه وعلي المره معاك
وعلي كل عيوبك دي قبلاك
وتصلح شي مكسور جواك
اهي دي حبيبتي
قابلتك امتا وفين وازاي
وانهي طريق كان جمعنا
وانا كل الطرق الي مشيتها كانت مسدوده
يا بنت الناس موعوده
بالوعد الي اخذته معاكي
اعيش ليكي العمر الجاي
حطي ايدك في ايديا وامشي معايا علي عماكي
يا شبيء اجمل من عزف الناي
يا اطعم من كوبايه الشاي
في ساعه صفي نص الليل
اذا عطشو الناس يسقيها النيل
وعيونك نيل بيسقيني
اي حاصل فيا
واد وشه مكشر

طبعه تقيل
ازاي مدلوق للدرجادي
وازاي سلملك وامناك كده عادي
لا مش عادي
كان حالف ميقرّب للحب
ما هو عارف كاس وجعه كويس
داق طعمه وعارف الاعيبه
وان الحلو في الحب مش اكر من عيبه
طب مش عيب
زمان كنت صغير طب دلوقتي
يقولو الناس بيكبرو ويخيبوه
الصبح كان يحلف للناس أن الحب ملوش لازمه
شافك بليل
تاني يوم الصبح بيحلف للناس
ان الحب دا متلازمه
يا حبيبتى الله يسامحك
هزيتى كياني وغيرتى في عيني الالوان
اشهد يا زمان
عليا وعلي كل كلامي
يا حبيبتى يا اجمل احلامي

يا ضي العين يا نور ساطع
كل الجاي هيكون ليكي
وتعيشي في حضني وفي امانى
في وقت ما كل الناس تحاربني
انتى سلامى .

يا ملهمتي

عرفوهم
ان الحاجه الضايغه لقيتها
وخببيتها
وهخفيها عن عيون الناس
ولي الناس تشوف اصلا
يقولو كلام
ميفرقليش كلام الناس
لا هينقص ولا يذود
ولا نظري هيتغير
هتفضل نظرتي ليها
هتبقي العاده واتعود
وحبي ليها مش هيقبل
دا كل يوم بيتذود
عرفوهم اني حبيت
حبيتها
وبيتي بيجهز نفسه
علشان يكون بيتها
فاتو سنين من التوهان
بلف عليها مش لاقى

وتايه مش لاقيلي مكان
ومش عارف هروح علي فين
لحد مقابلتني عنيا
عرفت في امان الباقي
في امان الباقي من العمر
علشان هيكون وياها
والقلب معدش هيتجرح
علشان هيكون في حماها
يا مولاتي
يا اجمل صدفه في حياتي
حياتي بقالها شكل جديد
بوجودك اتبدلت ايامي
اصبح كل يوم عيد
علشان بيبتدي بيكي وينتهي بيكي
بقيت عايش لجل عيونك
بقيت بيكي وليكي وعشانك
في إحسانك هقول اشعار
وهكتبك في ليل ونهار
كلام مهما كان حسنه
ميوصفش الي حاسه بنار

يا بنتي
يا ارضي وبلدي وسفنتي
تعيشي واعيش عشان خاطرك
واشيلك جوه في عنيا
يا ملهمتي .

تسجيل غياب

ولو جابت سيرتي في كلامها

عرفوها اني نيستها

موضوع قديم مقفول بايدها

لعله خير

مفيش نصيب مش نصيبها

ملهاش حظ تعاشر راجل اصيل

مهما كان حجم الحزن في فؤادها

مهما كانت تيجي عليه أو تميل

كتفه عمره مكان يخونها

في حزنها حزن يحتويها

وفي غيابها كان يصونها

بس يلا هنقول اي

هو دا صنف حوا

بياخد بالمظاهر والي ظاهر والي برا

مش بينقو الحلو جوه

هي حره

عرفوها ان دا مش عتاب

واني بعيد عنها خالص

رغم قرب مسافه بينا

واني لسه هبعد اكثر
ويبقي بينا حدود كتير ه
رغم جيره
رغم باب في وشه باب
يا بنت الناس
سجلك غياب وانتى قدام عنيا
مش ليوم أو يومين وارجع مشتاق حنانك
لا دا عمري الجاي دا كله
وان قلبي الي واقف عند بابك
حد فيكو يروح يقوله
انها حورمت عليا
وأنه لو مرجعش ليا هدوس عليه
حب ايه الي لسه بيحكي عنه
كان زمان مات زمان وخلصنا منه
ارجع علشان كرامتنا أولي
وعادي يعني كانت حكاية وعديناها
لا هي الأولي ولا الاخير
ولو علي الكسر
ديته شهرين جبيره
يا قلبي كفيالك وجع وجعك بيقتل فيا يوم بعد يوم

ما احنا ياما وقعنا يعني وبعدها بنرجع نقوم
اشمعنا يعني المره ديا
معاك ضيعنا سنين كثير حب فيها
مطمرش فيها
كل ذكري فاكرها ليكي كل صوره اخدتهاك
كل كلمه كتبتهاك
ولعت فيها
مش انتي يعني الي تكسريني
كان غيرك اشطر
شوفي حالك بكره تندمك الحياه
والحزن يكثر
وتقولي فينك
و ساعتها مش هتلاقيني
وتسبتلك الدنيا الي ضاحكه عليكي
معني كلمه تخسريني
بالسلامه .

اختك يا اما

يا امايا

ملقتش حد اشكيه الي جوايا

من بعد ربنا غيرك

دايم خيرك وحمدين ربنا علي حالنا

انما اختك يا اما محدش واقف جنبها في البلوه

متهانه ومرميه علي الارض حقها متاخذ منها

وساييه الكل وبصالنا

مستنيه تشوف بعد مشوفناها بعيننا رده أفعالنا

ومفيش حاجه بأيدينا

ومفيش حاجه بارادتنا كتفو أيدينا

والإحباط نتيجة كل محاولتنا

احمد شايل اخوه علي كتفه

وداود قاعد علي جست بنته

وصالح بيدور بين حطام علي امه

وقاسم قطعوله ايديه وفي أيده التانيه سكنته

وفي ام بتبكي علي فراق الاتنين

وعبدالله مش لاقى اخواته راحوا فين

ومهاب ساب أبوه تعبان في البيت

وجابله دواه لاقاه فوقيه بيتين

يا وحوش في صور ه بني ادمين
الروح من عندنا تساوي من ارواحكم الفين
اصغر اخواتي بير عبكم
غدر وخسه وجبن دي طباعكم
وش لوش واجهوهم من غير إعانات
انزلو الملعب لاعبوهم من غير رشوات
والله دا يكلوكم اكل يحوكم من علي وش الارض
يا رب الأرض والسماوات
النصر يا رب
شايقين الظلم بعنينا
وانت مترضاش بالظلم
عارفين أن التقصير منا
وكل ايدين سابت بعض
انما يا رب دي أمه حبيبك
انصرنا يا رب
لجل حبيبك تنصرنا .

سؤال وجواب

أنا طلباتي مش صعبه

مش بطلب يعني المستحيل

ولا جاي اتسلي واقول لعبه

العب بيها يوم اتنين واشيل

واطير واسيب العش وأشوف غيره

انا جاي علشان تبقيلي الدار

وأهل الدار

العيشه من غيرك زي دخول النار

بتعذب فيها علي غيابك

واديني اهوه قدام بابك

جاي وفي ايديا سؤال

سالت ومستني جوابك

جاوبيني والظفي بالتايه في حياته

أنا مش بطلب علاقه تغضب رب الناس

قبل الناس

ولا بطلب مكالمات تليفون بيني وبينك وشيطان وسواس

ولا طالب يكون بينا شتات مليونه كلام حب وإحساس

أنا راجل في زمن صعب تلاقي فيه رجاله

مهما الدنيا تغويه وتلعب بيه ويشوف اشكال والوان

يفضل ثابت علي نفس الحاله
انا جاي وبتقدم ليكي
والحال يمكن علي قده
وعمر الحب مكان بالغصب
انما اشاره بايديكي
اخليك المالح عذب
أنا سببت الدنيا واختارتك علشان تكونيلي انتي الدنيا
ولو خايفه اني ابص لبره واعيد الكره
يا حبيبيتي انتي الأولي والثانيا
لو جيتي تشوفي لحظات الفرحه في حياتي
هتلاقي هي اللحظه الي بشوفك فيها ولو ثانيه
جاوبيني
لو جيت خبط علي بابك
وطلبت ايدك يا جنابك
هل هل ..تقبليني
جاوبيني .

عدل الدنيا

حبيبتي لي بتبكي
مش دا الي وافقتي بيه
مش دا الي خدتي قرار تكوني ليه
مش دا البيت الي قولتي مناسبك
وهتكوني اميره فيه
طب لي بتبكي
ولي عيونك بتكون مكسوره
لما بتيجي في عنيا
مش أن الي زمان قولتي عليا
كلام كتير مش فيا
مش انا الصايح
عيل فسدان تلفان ضايح
بعتينني وقولتلهم باني البايح
والله انا مش شمتان
بالعكس أنا جوايا جبل احزان
زعلان علي الوضع الي وصلتيله
انا كنت الحالف والواعد والراجل بالكلمه وصادق
انما غلطان
كنت مفكر انك حباني

وفاكرك نصي الثاني
علشاني هتبيعي الكل
دوقتيني طعم الذل ولاقيتك اول واحده بيعاني
مساء الفل
الحال ميسور وتمام جدا
دلوقتي ربي عوضني بالاحسن
الحمد لله في كل الأوقات
حبك جوايا كان حب ومات
واشبعي بيه
ودوقي نتيجته اعمالك
وقوليلي اي رائيك فيه
والمرادي
من غير سلامات .

صدفه تجمعنا

انا كنت زمان مرتاح جدا
وقلبي ميعرفش عن الحب
لا بندم ولا بزعل ابد
وعمرى محسيت بوجع القلب
وكان القدر المكتوب أن الصدفه تجمعنا
وقابلتك

سحرتنى عنىكى وندهونى
وقالولى تعالى وجابونى
فى جنينه حبك حطونى
وسابونى لوحدى وتركونى
بتعذب وعذابك حلو
وعايش ايامى متلغبط
وبقول الله علىكى وكفوو
خلىتى المعدول بيخبط
وبعد مكان متشعبط
لقاله مكان يرتاح فيه
فى الركن الهادئ الى معاكى
بيقول بيحبك قولتىها
سمعاه الدنيا وسمعاكى

وعشان وياكي يسيب الكل
وبيحلم بالصدفه الثانيه
تجمعكم عشان يتكلم
مبقاش في العمر كثير عشان يحس ويتعلم
ويسيب الناس وأفكارها ويسيب الناس وبلاويها
ويجيبك علي ملئ وشه ويقولك كلمه مخبيها
اضحكي علي الدنيا وقابليه
وقوليله دي الصدفه الثانيه
قاعده معاك ومش ماشيه
جايلك وبكل إراده
متغيب عني ولو ثانيه
ونعيش مع بعض العمر الجاي
ونعمل بيت وأهل وحاشيه
يا الراجل الي انا بحلم
اقول للناس أن دا راجلي
وبيك معترفه انك قدري
من يوم فراقنا ووداعنا
وانا مستني انهارده وبكره وبعد الوقت الي مطول
صدفه تاني تجمعنا
ونعيد كلام قولناه

ونعيد الحسبه من الاول
جايلك وبقولك يا حياه
ارجعي علشان رجوعك حل
رجوعك هيحل وجعنا
بحارب صبري وما همل
وهفضل عالوعد مستني
ومستني هفضل مستني
صدفه تجمعنا .

عودي ليا

الحياه دي في بعادك شايفها ضلمه

الخلق دي بدونك خلق ظالمه

والزمن دا عشانك لسه واقف

والمكان اسود وباهت من غيابك

لسه قلبي عند بابك

لسه فاكر كل كلمه قولتيهالي

كل جمله

حرام يا ورده تجيلك المايا ناجده وترفضيها

حرام يا نبتة يطل عليكي ضي شمس وتمنعها

حرام يا كلمه نفسي مني تسمعها

اسمعها

الشوق في البعد دا بيكوي

والحياه بحبي ليكي كاسره ضلعي ولاويه ايدي

والظروف اسوء مما كانت عليه

عودي ليا فكي أسري من قيودي

قولي للي انكروني أن دا الي امننت بيه

حطي ايدك علي جرحي وخفيفيه

اقطع شك الي قالو يكتش صابه وهم أو جنون

قولي دا الي حب مره ورغم كتره لسه علي الحب يصون

عودي ليا
رجعي النور للعيون
لسه بمشيلك طريق لجل الوصول
حسي بيا حسي بالي عايش يقول
ربنا واحده الي عالم بالي فيا
انتي سامعه الي بقوله
ولا مش حاسه بوجودي
سهرانه زي الليل بطوله
ولا انتي خارج حدودي
يا ريت يا ريت يعني لو ليا تعودي
ارضي متاخده غصب عني نفسي مره استاعيدها
من بين جميع نساء العالم انتي الي بحلم المس أيدها
نفسى لما العمر يجري بيا تكوني جنبى تطميني
لما الناس تيجي عليا تكوني وحدك تنصريني
لما تهزمني دنيا الاقي حضنك يحتويني
عودي ليا وليا عودي
وفرحيني .

رايدك

قلبي المتدغدغ من الناس والايام
لسه اهوه بينادي عليكي
عيني متعبيه بكسر ازاز
ومع ذلك برضو باصه عليكي
ايدي المتحاوطه برباط للكسر
ممدوده ومستنيه ايديكي
مدي ايديكي متكسيفيهاش
في حياه قدام محتاجه تتعاش
والله ما اعيشها غير بيكي وليكي
يا هدوء يا سکون يا حزن يا ضل
يا بيت متحاوط بورد وقل
بشوف في الواحد واحد وبشوف فيكي انتي الكل
يا ست الناس يا تاج عالراس
مدي ايديكي ساعدي المحتاس
لملمي وياه أحرانه من الأرض
وارميها بعيد
قوايله كل الجاي مفيش غير فرحه
هلبسلك فستان بالطرحه
يوم مكون وياك هيكون يوم عيد

قوليله رايداك
ما يفوت الباقي من العمر غير وانا وياك
افرح يا حزين
الي اتمنيت حبها لسنين
دلوقتي بتقولك حباك
وفجأه
بفوق من اوهامي
برجع للواقع من تاني
وتاني برجع اعيش في الوهم
يا شيخه خلي عندك دم
حسي بواحد في قلبه سكنتي
حسي بإنسان كل آمله في الدنيا كل آماله كل الأفكار الي في باله
انتي
لو واقف بيني وبينك ميت شخص هشوفك برضو
لو بيني وبينك مليون حد هقابلك برضو
لو اهلك طلباتهم بتهد هنفزها بس
علشان يرضو .

متغير ليه

متغير ليه
وساعات الفرح قلت ليه
ولي الدنيا مخصماك
لي قافله وعانده معاك
والي زمان حلفت متسيب
لي دلوقتي بقت سيباك
ولي الحزن معاك طول
شريك وحده في كل الأوقات
خلصت كده
هترجع تاني تعيد من الاول
ولا خلاص مفيش إعادات
شكلك خنيت
ايوه انا خنيت
نفسى قصير
حبالكو طويله
جسمي المتكسر ملهوش تجبيره
انت ضعيف
اضعف من انك تشهد بحقيقه
اضعف من انك تاخذ حقك

اضعف من انك تجرح جارح

جرح فيك

امشي الباب مفتوح لو عاوز تمشي

لكن خليها في بالك

بتبقي معاهم لو عاوزينك

وبتبعد عنهم لما يعوزو

وبترجع ثاني لو عايزين

والكره في دم البني ادمين

لازم تكره علشان تقوي

بيع علشان مفيش شارين

سيب الحبل الي في ايدك

طرفه الثاني متساب والع

والنار بتقرب هتولع فيك

انا والع

كيف جسمان والروح طالع

انا حبيت والحب كسرني

اتمنيت خير مجاليش غير شر

ذكريات جوايا بتقتلني

مفيش حاجه بتنفعني

منابنيس منهم غير ضر

سابوني مكاني واديهم ماشيين

انت ميت

هما العايشين

هقوم

هسقيهم همي هموم

هسقيهم كاس وراه الكاس

ويوم ورا يوم

هعيش الدنيا الطول في العرض

مساحه مبين السما والارض

هيقابلو كل جواب طالبينه رفض في رفض

ربنا هيعوضني بخير

وزي مفي ناسي خاينين

في برضو كثير

بيمحو وساخه البني ادمين

وعجبي .

شباك الحبيب

لو تسألوني عن أكثر حاجه بكرها عموما

هقولكم شباك

كل مبص عليه ألقاه مققول

علي طول

صبح وليل

الناس في العشق بيسافرو بلاد وبلاد ويعدو حدود

لجل يطلو علي المحبوب

وانا ربي بلاني بحب قصاد الباب

وصبري يشبه صبر ايوب

علشان بس المح طيفه

أو اشوف من بين ضلف شباكه جمال مخلوك

الناس لجل القمر يطل عليهم يصبرو من شهر للتاني

ولجل اني اشوف قمري صبري بيعدي سنين

طب اشكي لمين

اشكي للبيت وحيطانه

ولا اشكي للشارع وجيرانه

ولا اشكي لمين

يا بنت الناس

افتحي شباكك

طلي عليا
بصي ولو نظره عاديه
ارمي سلام
بلاها كلام
انا راضي
يكفيني اني المح طيفك
وازقي الشوق جوايا بشوفتك
ولو جت في دماغك تقضي عليا
قولي بحبك
قولي حباك
هيغنيلي الشارع
وهيفرح بيت
وهصالح شباك
اسمعي مني وطاوعي كلامي
كل مقابلاتنا كانت في منامي
نفسي تكون مقابله حقيقه
وباذن الله هجيك وادخل من الباب
وافتح شباكك بايدي واعاند فيه
واقعد جنبك وابص عليه
بس انتي توافقي

وافقي علشان اخذك علي طول
حرام بعد الصبر دا كله وتعب قلبي
في الاخر مييقاش مجبور .

رد اعتبار

يا تري يا حلوه يومك ماشي ازاي
يا تري من غيري ليه طعم الشاي
يا تري عامله حساب الجاي ولا الدنيا مكمله كالعاده
انا مش بسال علشان مهتم جرح فراقك كان جرح ولم
انما دا فضول بزياده معتبرك في حياته مجرد ازمه
وكل العصوبات والأزمات بتفوت بالوقت
مش قولتي زمان اليوم في بعادي بيعدي سنين
الا قوليلي كام عمرك دلوقت
كل كلامك كذب في كذب
وعملت عبيط قال اي صدقت
بستغرب نفسي في مواقف صعبه
ازاي ملاحظتش أن الكذب دا جاري في دمك
روحي يا شاطره شوفيلك لعبه
عدي عليا كتير شبهك
من كتر جروحي الي في قلبي
من كتر الندبات الي في جسمي
ومن كتر ما جيت أنا علي نفسي
كنت أنا مانع موضوع الحب
شوفت عنيكى بتنادي عليا

فكرت شويه قولت تعالي
قولت دي اجمل حاجه حصلالي
قولت الصبح والمظبوط
وظلعتي الورطه واكبر غلطه
ودفعت تمنها أنا بالغالي
اذا كان علي كل الي خسرته
انا مش خسران
واذا كان علي وجع القلب وحيرته
بعد الصبر دا في جبران
ربي هيجبرني بناس غيرك
هيفوت الوقت وانساكي
واذا كان علي الكسر المكسور فيا
انا نفسي في مره تعاتبني ضميرك
وانا عندي اموت ولا ابقي معاكي
وانا بسال نفسي كتير ياما
ازاي نفسك دي مطوعاكي
تاذي قلوب وتدوسي عليها
ومش قابله عتاب ولا ملاما
بينت الناس دي شهاده يشهد ربي عليها
انا عمري في يوم ما اذيت فيكي

وكننت معاكي كما يقال
وكننت بشيل وياكي الهم رعم أنا همي يساوي جبال
كننت معاكي صادق جدا لا يكون كداب ولا محتال
ولا كننت بسبيك ويا الحزن لمعاد أجل
لكن في بنات كده في الدنيا
ميعجبهاش الراجل وتسبب الراجل
من اجل عيال
وعجبي .

طماعه

الحال مش واقف
والدنيا مكمله عادي
ومعديا بايامها بهدؤ وسكون وبصوت هادي
واذا كان علي بلك أصبح جافف
واذا كان علي جرحك أصبح خافف
وانا كالعاده بقولها
مجتش علي المرادي
ازمه وعدت مده وعدت
شوفتك انفتحت نفسي علي الحب
ولما عرفتك نفسي اتسدت
لو فاكراه أن البعد قاتلني متهيقك
انا ادوس علي قلبي لو اتحرك
علشان واحده جعلته متشارك
في ناس كده عندها غيه
وصفاتهم ما بين حيه وحوريه
لما تشوفهم بتلاقي عيون مليانه امان
واكمن أنا يعني مش شخص جبان
نزلتهم بايدي المايه
مع اني مش بعرف اعموم في الحب

مديت ايدي ومسكت فيا
وشوفت الغدر بعين عينه
ومعاك أن أنا عفوي وبندب
وعرفت قسوه الحب
بعد حنينه .

حدود

ونرجع نحكي في القصه وحكاويها
ونفضل فيها نعيد ونزيد بحلاوتها وبلاويها
مازلت أنا بعند مع الناس الي نصحوني متنفعلكش متستهلكش
وبكتب ليهم باقلم الثقه وحبره الامل وصبر كجمل
بقول ليهم أنا ليها
مسيرها في يوم تعود ليا
تهون عندي دنيايا وتسهر جنبي لياليا
يفوت العمر يوم ورا يوم وهي في حضني مرميه
هكتفي بيكي عن الدنيا ويحبسنا الحزن ويبقا العالم بالنسبالنا شي مجهول
بقول لاكثر واحده حبيبتها بشكل مش معقول
من غيرك حياتي ما ليها اي لزوم
ما زلت أنا لسه علي صورتك بنام وبقوم
انا
سمعت كلام عن نفسي مبقبلهوش لكني قبلته علشانك
قالو بأن أنا موهوم
بنتيجي كتير علي بالي وافكر فيكي وبسأل نفسي
أنا مبجيش علي بالك ولا بمر مرور الصدغه في خيالك
أنا مهموم
ومن كتر الهم الي صاييني وحظي النحس الي صاييني

ووجع القلب الي تاعبني
بحس كثير باني بموت
كلام كثير جوايا وكله عتاب بقرر اني اقولهولك
ولما عيوننا تتقابل يعدي سكوت
مع أن الفرق ما بينا كثير والبعد مبينا كبير
وبيني وبينك مسافات وبلاد وحدود
بحسك لسه ويايا
مش قولتي زمان أننا نصين بنكمل بعض
وحلفتي بانك عايشاها معايا
بقرفها وبصداعها وربيعها وشتاها ورعد
طب ليه البعد يا حبيبي ولي سيبيتي وخلفتي الوعد
سيبيتي من غير حتي وداع
سيبتيني في مكان مجهول
خدتي المركب ونزلتي البحر ومشيتي علي طول
ازاي يا حبيبي المركب هتسير وناقصها شراع
انا
انا كنت شاربيكي
وماشي معاكي
ومطمن بيكي
وبقيت متباع

خوفت عليكى واهملتيني
ذودتك حبي ونقصتيني
حافظت عليكى وجرستيني
وبقيت في ضياع
وبقيت مهدود
ولسه القلب مجروح محتاج يداوا ويطيب
مزال البعد هو البعد
وبرغم انك ساكنه قريب
لسه ما بينا
مسافات وبلاد وحدود
وعجبي .

مكسبي خسارتك

لو علي الجرح هيداوه
ولو علي الحزن هيتاوه
ولو علي العزاء مفيش عزاء غير بالطار
هاخذ عزايا بايدي بعد مطفي النار
ولو علي الضرب فضربي الجاي بغباوه
لاكثر واحده قتلت قلبي باستهزاء
واكثر واحده خلت حبي غباء في غباء
ملوش لازمه خلاص الشرح
والجاي هيبين وانا مش هذود شي
دا كل الجاي طرح في طرح
ولو يعني كنتي مرضيه بكل الي عملتية فيا
فا أنا مش مرضي
أنا مش مرضي
دخلتي الأرض وحرقتي الورد وكل ما ليا
هاخذ حقي وحق الاعتداء علي ارضي
ولو علي القلب اموت ولا أن قلبي يحن
ولو فاكره أن بعدك قلبي حياتي
فا أنا لسه بكل حالاتي
بسمع راب وبكتب شعر ومع سيجاره شويه بن

أنا عارف انك معميه
بفلوس ولبس وعربيه
ولجل أن الحال علي قده تجرأتي وجيتي عليه
عمر الفقر مكان ضعف ولا شي الواحد يخجل منه
وعندي أنا كنز ولا تعرفي شئ عنه
عندي كرامه وعزت نفس
ويقين بالله عمري مقلبي حس بنقص
الفلوس لا بتخلق راجل
ولا تسعد بيت ولا تعمل حس
خليكي معاه وافرحي بيه
افرحي بالي انتي كسبتيه
ونصيحه لله او عي في يوم مالجيب ينقص
ترجعي للي خسرتيه
علشان لليوم ده نيتي بايته نيه بشر
الطير المتقيد بيدك أصبح حر
كل الفايت كنت انفع ناس
كل الجاي مفيش غير ضر
والي يفكر يوم يلعب بيا
الي يشوفني مجرد فيلم ومسرحيه
ههد الفيلم بايدي وأخرج عن النص

وهبدل دوري بدور الشر كله ازيه
منتيش يعني اول واحده ولا اخر واحده
اصل أنا أصلي وتربيتي بتجبرني
أن لو الكون اتهد
عمري ما ازعل علي واحده
ولا تدمع عيني ولا اشكي لحد
ولا اعيط ولا ادبب في الأرض
والله خسارتك عندي مش اكثر
من خساره مباراه وديه
ملهاش لازمه ومتفرقش في شي
فتره وجودك زياره عاديه
دخلتي حياتي رحبت وضايفتك
ولما مشيت زعلت شويه
لكن والله مكسبي خسارتك
وعجبي .

بطل تفكير

من يوم مظهرت أنا جواك
لسه زي ما انت لحد دلوقتي
لسه بتسامح اي حد ازك ولسه بتعدي
تملي بتدي بزيادة وترمي وراك ومتدورش
نصحتك ياما وقلت كثير ومبتتاثرش
من اول واحده دخلت قلبك
وقولت عليها كل كلام
قولت عليها ضله في ساعه الشمس
واحسن حد اتخبي فيه من الايام
واديك واقف بتتفرج من عيون الامس
لاول واحده وجعت قلبك وكسرت فيه
وكل كلامك شافت عكسه وعملت بيه
ومشهد الجرح الاخير مشهد خيانه
اتنين صحاب علي العهد متفقين
في وسط الحرب كتف في كتف وفي الدنيا ماشين واحده بواحد
وفجأه
باع الصاحب صاحبه عشان واحده
ولاخر واحده دخلت قلبك
واحسن واحده تمثل حبك

وبرضو انت صدقته
معاك عذرك تفوق ازاي
والعقل بايدك قتاتته
بتستفرك بكلام مش عارفه انهارده هروح فين وهقابل مين وهدفع كام
وقلبك خام
بتعيش او هام وترسم حلم جميل وتربط حياتك بحياته
ما انت اصلك طيب و علي نياته
وعلشان كده كسرت فيك
كنت شايفها طوق ونجاه و اخر أمل متعلق بيه
واديه سابت ايدك وغدرت بيك
من الليله أنا بناديك
مفيش منها خلاص الطيبه
مليش في الدنيا اي حبيبه
مفيش صاحب من الأمان اديه
ولو بتقول انت باقي عليا
مفيش حد هبقي عليه
وعجبي .

محطة قطر

البلد دي مش بلدي
والناس دي مش ناسي
في بعدك كل الناس اغراب
في قربك بيتولد احساسي
احساسى الي ودعته بعد فراقك بلحظات
وفاكر كل زكراكي
فاكر مشينا و عدنا للخطوات
وفاكر يوم وداعك في المحطه
أنا مشتاق لمعاد لقانا
أنا الي واخدها لف علي المحطات
بأمل اني المحك مره
وأشوف الطله
واديني متقيد بقيود الماضي
وانتي عايشه في بعدي حره
انهارده جالي شعور جدد جوايا الامل
مشيت وراه وعندي يقين بأن غايتي تكتمل
باني اشوفك
وجوايا اتنين بيتحاربو معايا
وترتبهم عكس كل ترتيبى

وحشاني
وحشاني منك النظره ووحشاني كلمه حبيبي
وصلت هناك
وجوايا صوت بينادي دي كانت ظلماك
واصحابي كنت مجروح وعيشت عليهم دور الجارح
وانا المتساب وقولتهم باني السايب
وبجهلي وعدم فهمي وبيأسي
لا زلت أنا بكذب وبضحك لسه علي نفسي
بقول مسير العمر يفوت ويجري الوقت وانساكي
أنا من غيري من دونك وكننت أنا بيا وياكي
ظلماني لكني مسامح و غافر كل خطاياكي
وفوقت من كل تفكيري لما سمعت صوت القطر
وقولت اكيد هترجعيلي ونمشي الجاي سطر بسطر
وقفت هناك وشوفتك باصه من الشباك
عيون بتدور علي الغايب
واتاريني مش انا المقصود
وظلع غيري وطلعت أنا الخايب
قلبي الطيب عاش بيطيب فيكي
جيتيلي مكسوره من الايام
وعشت بعمرى أسند فيكي

وبعد الروح مرجعت ليكي
وشميتي نفسك حبتين
قطعتي الايد الي كانت تداويكي
يا معاليكي
انا استكفيت وفاضت بيا
لا عاوز اكمل عمري معاكي
وبكفايه عليا جرحك فيا
خلاص خلصت وشطبنا
عاوز اعيش الجاي بأمان
واحدد مين اديله مكان
وأشوف مين خبط علي بابنا
اشوف مين يستاهل قلبي يعيش فيه
وأشوف مين يستاهل حبي من الحب ادويه
حد بجد شارينا بعمره وبعمرى افديه
حد عشان ضحكتنا تبان يشاكس فيا
واحد بجد نكون فارقين وياها
واحد تديني الأمان وتمشي معايا علي عماها
وتسلم ليا
اهي دي
تستاهل تتشال في عنيا

وعجبي.

واحشني يا ابويا

يا سيد الناس يا عم الناس
يا اكثر حد شال همي
أنا ابنك ومن ضهرك
ودمك جاري في دمي
يا اكثر حد زعلني
لخوفه عليا من بكره
أنا في بكره ولي انت مش جنبي
عايش في الدنيا مطمئن
وماشي سايقها طول في العرض
وفجأه مشيت وسبتني
لي ودعتني بدري؟!
بحسك ووجودك حاسس ان الدنيا كلها معايا
ومن غيرك بقيت حاسس اني لوحدني
يا ابويا أنا مكسور
أنا الأرض الي من بعدك أصبحت بور
ومن كتر الي جوايا
بخاف ابص في مرايا
اشوف الوش الي يشبهلك
تزيد علي كسرتي كسور

واحشني يا ابويا
تعالى وزرني فى منامى
وبالله متقطع بينا الوصل
تعالى فى كل احلامى
وخليك لكسرتى الدوا والمصل
كنت أنا الصورة زيف
وكنت انت ليا الأصل
وبالله تكون مرتاح
يا رب الراحة من عندك
لاكثر حد علمنى ازاي اصون ودك
واكثر حد فهمنى
باني لما احس بديق وهموم
ما ارتاح الا فى صلاتى لما اقربك
يا ابويا
باذن الله معادنا قريب
ونتقابل فى جنه خلد
ويبقى الشوق شوق حبيب لحبيب
متقلشنى
امى هاخذ بالى منها بجد
واختى هقدم لىها كل الحب

وهمسح بايدي دمعت اخويا
ووعد مش هفوت فرض
لكن والله ورب السماء والأرض
واحشني يا ابويا

...

اهداء الي كل ابن زاق فراق الاب .

سؤال

المره دي
كل الحاجات مختلفه
كل المواقف اتبدلت
كل القلوب استسلمت
ورضيو بالمكتوب
قلبي راضي بالمكتوب
كل الي قولتيه رضيت بيه
رضيت بكل العيوب
وكل كلامك الجارح بحاجات مش فيا
المره دي الجرح مش ليا
جه الدور عليا
اقسي واطمع واكون اناني
وتسمعي مني كلام ساالم
يسم البدن والروح
لو روعي فيكي تروح
وموافق اعيشها وحداني
ربي الي بلاني بحبك
وعماني عن اني اشوف كدبك وتمثيلك لحنائك
انهارده انعم عليا بنعمت نسيانك

ومتستغربيش

كنتي بالنسبالي زي نن العين

يقفل حضني عليكي لو خطر قرب

واديني يا ناس اهوه متغرب

عشان واحده متستاهل

أنا الجاهل وانا المعتوه

عشان شوفتك في يوم املي

وبخيالي حسبتك فرد من اهلي

واتاريني وعن غير عمد وبحهلي

طلعت اني في متاهه بتوه

ودا ولا لوم ولا عتاب

ولا عمري طلبتها من حد

بعد الفراق يرجعنا تاني احباب

ولا عمري قولتها لحد

بانه يرجع يفتح في وشي الباب

مشيت ورضيت ودا قرارك وبايدك

مترجعش تقولي سماح وانك عبد وانا سيدك

ولي بتعذبي روحك مع واحد دماغه صعيدي

رجوع؟

رجوع مين مفيش منه وخرج الأمر من ايدي

ما كنا زمان حلوين
وكانت أرضنا البور
زمان خضره بزرع ومايا وطين
ولو علي الحب يغور
في داهيه الحب لو ليكي
اوعي تفكري انك ملكتيني وانك ملكاني في ايدك
واني معرفش اعيش حياتي غير بيكي
ديتك عندي يومين اقضيهم كئيب مسطول
مش انتي يعني أولهم ولا آخرهم
ياما علي الرأس دقت طبول
لكن دائما في شي مجهول
والشي ده هو سؤال
عاوز اسمع رده
ليه الي يتاقلك بالمال
ويعزز من قيمتك ومكانك
يوم ميطلب تطيبي خاطر
ما يلاقي غير صده .

قدام بابك

زمان كنت قاعد قدام باباك
وقولت حطي كلامي في حسابك
لو مئه مره رفضوني
وعاندو معايا وعاالادوني
ومنعوكي مني وبعدونني
عمري في يوم مهستسلم
وعيشت مديكي الامان
وكنت أنا بيكي مطمئن
قولتلك عمري معيش من غيرك
او عاكي تعيشي من دوني
استحمل اي شي لاجلك
حتي اهلك هستحملهم
فجاه الكل تركوني
وكنتي انتي أولهم
أنا مش زعلان أن أنا شوفتك بيت
أنا كل زعلي أن أنا شوفتك حاجه
وطلعت أنا في الحاجه اتخميت
وفاكرك هتبقني معايا عكازي
وتفتخري بيا قصاد الناس

وتقولي دا ابويا وحببي وجوزي

دا راجل ضحي بعمره لأجلي

وعلشاني حارب أهله واهلي

لكن غلطان

وفكري مكانش في محله

طلعتي شيطان

بيوهم العبد بالمتعه

وبينسيه طعم الجنه

وان المشاكل بيتحله

أنا الموهوم

أنا الي عيشت حياتي فاكر اني بيكي بقوم

وطلعت بيتخسف بيا الأرض

أنا في العشق شوفتك زوجه وام ودين

وكننت في عشقك مبفوتش الفرض

وطلع أن قانون العشق لا يحمي المغفلين

أنا مغفل اني من بعدك أصبحت حزين

واحزن ليه وبسبب اي وعلشان مين

متستاهلش

أنا الي استاهل

اني في يوم فكرت اني بيكي هعيش

طلعت أنا جاهل ومعمي و علي نياته
ومش هنسي أن أنا العبد الي بعد ما مات
أراد ربه يرجعه تاني لحياته
ومش خالصين حقي هير جعلي
وحقي هاخده بطريقتي
صبرا لازم تدوقي طعم الندم
لما تلاقيني في قصر امير وهي اميرتي
وانتي مش اكثر من واحده في وسط الخدم
عندما يبتليك الله فصبرا
البلوه تمحو الزنوب
وتيقن بأن بعد الصبر جبرا
وما بالك إن كان جبرك محبوب .

انتهت

الليله كل الحكايه هتنتهي
والبعد هيبقي بعد مؤبدي
لو تفتكري معايا زمان
ايام كلامنا واتفاقتنا والأحلام
في حلمك شوفتيني لابس بدلتني
وفي حلمي شوفتك زوجه في شقتي
حلمت بطلتك وبطلتي
بفستان وبدلتي
وخليله ليا في وحدتي
بصت الدنيا علينا
بعين هزيئه ونيه شينه
كانها بتخطط لشيء
تحط لينا الف حد وتبني بينا حيطه سد
وتقلب حال القلوب الفرحانه
لقلوب حزينه
ياااا دنيتي

مع كل قلم هيترفع عن قصيده كتبتها بكوبايه شاي
مع كل جواب انطبع بصوت موسيقي وعزف نااي
مع كل غايب لبينه رجع بعد غيبه طويله الااي

ابشري واطمني الليله كل الحكايه هتنتي
حبيبي اسمحيلي أسرق لفظ مش من حقي واقول حبيبي
القدر الي جمعنا بصدفه زماان
جابني انهارده لنفس المكان
بيفكرني بكل الي كان بعد ما غيبيتي
واديكى اهوه الليله عروسه بحضرتك وبحضرتك
واول معيني جت عالباب شوفتك طاله بنفس طالتك
خانتني عيني وخالفت امري وفضلت باصه عليكي
باصه لعنيكي مستنيه نظرتك
كنت انا لوحدى في دنيا ميت وانتي عايشه في دنيتك
ايدىكم حضنت بعضها وكل الحضور قالو يا بختها
والحظه حسيت كلهم بصو عليا وقالو يحسرتك
وبرغم كل الوجع حسيت بفرحه لفرحتك
ومشيت مغادر بلدتك
الليله هنام من غير مسمع كلمتك
تصبح عليا وأصبح عليك
واقولك نامى يا زفته تقولى نام يا تبت
الليله
كل الحكايه
انتهت....

محببت في الوجود قدك

حبيبتي وضي عيوني
وكل كلامي ميوفيش حاجه من طرفك
يا ساكنه الروح حياتي تروح فداكي انتي
يا صاحبت عمري ومسيرتي
يا اغلي الناس يا كل الناس
يا بيتي واهلي وعشيرتي
يا سنداني و واخده بايدي في الدنيا
وعارفاني بتلاكيكي والاعيبني
وعارفه حاجات كتير ثانيه
وعارفه اني كتير بنسا وده عيبني
صحابي ساعات بنسي اكلهم
وعيلتي ساعات بنسي اكون بينهم
لكن والله يا امايا معمري انساكي لو ثانيه
تعيشي واعيش علي حسك
خدنتي الغربه كتير منك
واغيب عنك شهور وسنين هه
وما ارتاح الا في حضنك
فاكره يا امي قعدتنا في ضحويه
طلبتني مني اجيب حاجتين

وانا مجبتش

تقوليلي ماشي يا بتاع دعاء وحنين

واسراء ومين تاني يا واد فكرني ياسمين

خدوك مني يا واد ونسوك امك

نسوك الي شالت همك

وعانت من السنين لاجلك

كلمه هقولها يا امايا

ورب الكووون الدنيا وما فيها تهون ولا يهون عليا في يوم زعلك

وزي مقال هشام الجخ

وحيات الي قام حدي وقام حدك

محبيت في الوجود قدك

وعجبي .

مشهد من فيلم حزين

مشهدين ولا مشهد

ولا هما اتنين في واحد

عاش حياته كلها ضحك وهزار

ابوه وامه يدوقوه العسل ويدوؤو المرار

ما أصله الحيله وجي بعد اتنين بنات

بعد شوقه

اي يا نوره عاجبك

حبيتيه طب صونيه

اي يا احمد صاحبك

لا انتم اخوات بالام ولا بالدم

بس بتقول عنه اخوك

طب خليك معاه ومتبعهوش اشترية

المشهدين عكس بعض

هو واخذ عائلته بوكيه ورد وعلبت جاتوه

والتاني واخذ احمد وشله صحاب وسهره حلوه

هو بيخبط عالباب فتحت ام نورا وأبوها واقف بيعدل لياقه البدله

واطفال بتجري تستخبه وبيرددو كلمه وصلو الضيوف

اتفضلو سلام بفرحه ومحبه

التاني قعده في كافيه ولسبب متعرفش لي

قهوته الي دائما زياده طلبها ساده
هو ازيك يا عمي عامل اي وشي جواه حاسس بخوف
دخلت ام نورا بحلو وجاتوه تضاييف ضيوف
التاني كل الوشوش في القعه بتضحك الي وشه كان عبوس
هو قاعد مش مرتاح مرتبك وامه بتقول فين العروس
التاني وصله رساله محتواها دعوه خطوبه من حبيبته
تعايير وشه متغيرتشي كأنه كان عارف بيها
مردش عليها بص لاحمد وقام وقف في اي مفيش خد بعضه ومشى
مشى احمد وراه
هو بيبص عالباب شاف نورا طله عليه
وفي ايديها صنيه قهوه سلمت نورا
التاني ركب عربيته وساق بسرعه مستحيله
نورا قومي ادي لعريسك قهوته قامت نورا
ويشاء القدر توقع القهوه عليه
كان القهوه هي الحاجه الوحيده الي رافضه ارتباطها بيه
والتاني في تقاطع طريق وست واقفه علي جنب الرصيف
بتشاورله بصرخه حاسب اهدي هدي
ذاد في السرعه بجيت تريله داست عليه
بعد الحادثه بثواني مكانش حاسس بوجع في جسمه الي اتكسر
غير في قلبه الي انكسر من اقرب حد ليه وفارق حياته

وساعت جنازته وفي مماته جات نورا وحضر احمد وفي أيديهم دبلتين
ايوه العريس كان احمد وحب حياته كانت نورا الي ضحكت عليه
كل الناس خانته وكلهم مشيو وراه
كل الايادي طعنته والايدي الثانيه كانت حضناه
وفي المشهد الاخير
لا نورا صانته ولا احمد اشتراه
شكرا.

سلامات

اذا كان وضعك من بعدي عايشه ومرتاحه
وسعيده ومليانه مساحه تكفي لغيري
ويكون ده مصيرك
فمصيري هيكون الاحسن
هضحك وهطير وهعيش وافرح
هوقف علي بابي بنات طوابير يستنو الكلمه أو النظره
سلامات

سلامات يا حلوه فوقى لنفسك
واعرفي اصلك والزمي حدك
اسالي اخوكي وابوكي وعمك
هيقولو سيدك وسيد عيلتك وسيد بلدك
ضيعتي بايدك جوهره نادره
وانا مش زعلان
بالعكس أنا طائر فوق في السما فرحان
علشان في نص طريقي وانا جايلك
وقفني عقلي وخلاني اعيد تفكير
انك متستاھلش مش انتي الي اضيع عمري عشانها
واني استاھل اعيش علشان واحده شيلاني في كل كيانها
واحده تفخر بيا قدام ناسها واهلها وجيرانها

اول مره يطلع عقلي الكسبان
يمكن علشان غلبان والطيب و علي نياته
اعيد تفكير ويراجع قلبي حساباته
ويا رب الدووم علي هذا الحال
يا رب الجاي بس الفرحة
وتريح يا رب الببال
وسلامات .



الشاعر عوض حسني الدعبوسي من مواليد 2003 والذي يبلغ من العمر
21 محافظه البحيره
يتميز عوض بانه شاعر قصائد حزينه .